

Հոգի, իսկ ընդհանուր գաղթականութեան թուի մասին՝ ինչպէս վերեւում տեսանք, ասում է թէ “տարագրեալ ժողովրդի բանակի լայնութիւնն էր Գառնու լեռների ստորոտից մինչեւ Երասխ գետի եզրը, իսկ երկարութիւնն, մի օրւայ ճանապարհ, իսկ ուրիշների գրելով 5 օրւայ ճանապարհ”:

Շարդէն եւս ոչինչ չէ խօսում գաղթականների թուի մասին, չէ յայտնում ոչինչ եւ այդ մեծ գաղթականութեան ականատես վկայ Անտոն եպիսկոպոս Գօվէան, որ մանրամասն նկարագրում է գաղթականների կրած ծանր աղէտները: Տեղեկութիւն ունենք միայն Հին-Ջուղայի բնակիչների թուի մասին, որ Շարդէնի ասելով, 4000, իսկ Շոպէնի ասելով 8000 տուն էր: Եւրոպական յետագայ պատմագիրները, օրինակ՝ Կ. Բիտտէր՝ ընդհանրապէս 24.000 ընտանիք են հաշւում Հայաստանից Պարսկաստան գաղթեցրած Հայերի թիւն: Եթէ ամէն մի ընտանիք միջին թուով 10 հոգուց բաղկացած հաշուենք, այն ժամանակ կ'ունենաք 240—250 հազար հոգի: Բայց, տարակոյս չկայ, որ գաղթականների թիւն աւելի մեծ էր, ի նկատի ունենալով այն ահագին տարածութիւնը, որտեղից քշուեցին Հայերը: Այս օրերս հրատարակուած մի նոր եւ նշանաւոր աշխատութիւն, որի հեղինակն է Կ. Եզեան, յայտնում է, թէ 60 հազար ընտանիք գաղթեցրեց Շահաբբասը, բայց այդ 60 հազարից միայն 20 հազար ընտանիք հասան Պարսկաստան, մնացածը ոչնչա-